

山西通志卷第一百二十五

山西巡撫都察院右副都御史臣覺羅石麟奉

旨修輯

人物

二十

蒲州府

明

祝春蒲州人學行冠一時有偉望明初以儒士舉爲通政司
叅議累擢詹事府少詹事卒於官太祖惜之賻卹特厚

蔡瑄榮河人洪武開國初以學行貢於廷授儀禮司序班有
賢聲累擢通政使司通政使糾正乖謬百僚肅然尋以病
乞還卒於道訃聞太祖震悼製文以祭復其家三年

袁泰萬泉人洪武四年進士授羅山縣丞擢都察院試僉都

御史遷左右副都御史泰才辨明習法律居心廉正當太祖開國初用重典繩臣下泰輒據理法爭甚力多所保全卒於官太祖深悼之遣使致祭

趙鼎字玉鉉蒲州人洪武庚午舉人授汧陽儒學訓導汧陽故隴西地俗多獷悍諸生率弧矢自雄鼎至嚴爲科條以身表率踰年士風丕變秩滿調三河丁內外艱補滑縣所至皆飭教法如汧陽時正統元年致仕歸卒年八十一薛文清公爲之誌又漢中同知王聚淮安同知李威白水丞謝伯榮上林錄事賈教俱賢而壽至正統間始歿當時以生同時壯同仕老同歸砥礪名節保全終始稱爲河東五老監察御史謝琚有五老傳謂中條有五老峰實鍾生賢喆云

陳榮祖臨晉人洪武庚午舉人授富平洛南商縣濟源知縣
守正不阿爲權貴所構幾危以治行得免府志稱其居官
有留犢之遺風處鄉踵息訟之懿範陝西通志云商縣兵
火之餘縣治俱廢榮祖爲政有方吏民畏服刼建祠宇壇
壝百廢具興

薛魯蒲州人建文己卯舉人官工科給事中嘗三奉命使占
城交趾儀觀雄偉議論慷慨所至輒傾其座人後卒於交
趾勅賜歸葬

張福蒲州人永樂庚子舉人授鞏昌府教授淹貫經史勤於
訓迪人材多所造就陞國學助教後陞山東平度知州律
已廉介鋤强扶弱稱循吏尋陞大名知府卒於官平度民
詣闕求立祠報功制定祭儀春秋祀之子侃景泰癸酉舉

山西通志 卷一百二十五 二
人授西安同知發奸摘伏陞鞏昌知府招撫勞來嘉意綏
輯歲祲蠲稅發賑禱祀祈霖民不爲災進階亞中大夫
衛述蒲州人少從薛文清學以躬行爲本文取達意不纖麗
以爲工景泰庚午舉於鄉授武定州知州剛直清敏及拊
循小弱倍極仁慈調莒州毀淫祠興學校修廢舉墜涖任
十年代去民咸思之

孟琳蒲州人景泰庚午舉人聰穎厚重從學薛文清得其正
傳會試時石亨托鄉誼相延不往除知邳州陞淮安同知
涖事精敏綽有政聲子汝濬歷官知府卒貧不舉喪楊襄
毅爲之經紀汝涖通判希孔進士爲扶風知縣卒於官士
民具棺槨皆以節著翰林時芳亦其孫云

謝廷桂蒲州人景泰癸酉解元會試時曹石輩爭館之廷桂

拒曰君危如朝露欲免我耶未幾果敗成化初同知常州廉明果斷治行爲江左第一陞河間知府未任以事憤激辨章凡十餘上違制被謫宏治末放歸田里

張達蒲州人成化甲午舉人授陳留知縣挺持大體擊強悍舉廢弛豪猾革心去之日縣人爲建祠轉光州政聲益著王瓚萬泉人父庭寧晉知縣瓚少有才名舉成化甲午鄉試授山東卽墨知縣廉潔鯁直事至立判居七載卒於官幾無以爲殮人甚悼之

謝豸廷桂仲子宏治己酉舉人工文藻饒治才守寧羌民爲構祠西平巨寇東治河決宸濠之亂從容安輯兩賜璽書褒之晉階朝議大夫

翟敬字行簡猗氏人宏治庚戌進士授翰林院檢討性耿介

遇權貴用事者於庭直斥其奸聞者汗下免官歸數年補河南布政司照磨遷休寧知縣平徭役理疑獄一時以青天呼之後官遼東行太僕寺少卿致仕卒年九十六歲景佐蒲州人宏治庚戌進士授東安知縣有惠政遷都察院經歷因忤逆瑾矯詔下錦衣衛獄尋謫開州判官累陞河南叅政所至執法吏民莫犯比歸杜門養重姪溱正德辛巳進士與兄瀾相友愛嘗途遇盜兄弟爭代死以免於難鄭岳字汝華蒲州人宏治癸丑進士授戶部主事遷員外郎疏論總督許進總兵趙日永二人出爲湖廣僉事遷廣西副使調廣東所至皆有異政十三道合疏其治績聞於朝遷江西按察使歷左右布政使勘副使李夢陽御史江萬實許奏事爲逆藩宸濠所陷罷歸宸濠敗起四川右布政

使以母喪未終不赴嘉靖初擢右副都御史巡撫江西旣至請賑恤受兵郡縣論次討平逆藩軍功贈祀死事諸臣未三月擢大理寺卿疏陳時政皆切中遷兵部右侍郎轉左侍郎大同兵變議令首領官各誅首惡事立定總兵桂勇有平逆功大璫奪以與其弟姪力駁正之權倖胥側目羣起媒孽其短因致仕歸家居十五年薦起者六卒不用蓋以議大禮爲張桂諸人所忌云

王璽猗氏人宏治戊午舉人嘗讀書桃花洞掘地得一石文曰大將王璽益自負正德辛未成進士除行人承命出使以廉介自重冊封列藩一介不染備兵寧夏謹畏平恕人不敢欺張恭肅爲巡撫議以代已會丁內艱歸再備兵榆林遘艱歸家居十五年卒識者惜其才之不盡云

史魯字宗道蒲州人南陽經歷臣子正德戊辰進士授鎮江推官性剛毅涖政嚴明數平反冤獄有懷金謝者峻拒不受太宰某以刺來爲人干請裂以還之治其人如法擢南京刑科給事中章二十餘上中劾冢宰及叅贊司馬守備太監並逆藩宸濠奸謀尤偉尋爲倖臣錢寧所忌罷官歸家居閉門高卧安貧樂道蒲人謂爲楊貞菴瑩後一人

郭震蒲州人正德戊辰進士授大理司評事累官河南僉事時流賊騷徐豫間震防禦保障屢著奇謀潁人立生祠祀之終遼東苑馬少卿

楊守禮字秉節蒲州人正德六年進士除戶部主事嘉靖初屢遷湖廣僉事以計擒公安賊魁坐事謫叙州通判累遷右副都御史巡撫四川與副將何卿平諸番賚銀幣初守

禮貶叙州爲僉事張文奎所辱至是文奎遷四川叅議以
先所撫事奏詔俱解職守禮才器敏達中外以爲能工部
尚書秦金等會薦起河南叅政再遷右副都御史巡撫寧
夏寇犯固原爲總督劉天和所敗欲自寧去守禮與總
兵官任傑等邀敗之尋進右都御史總督軍務代天和錄
前功進兵部尚書總兵官李義楊信連却吉囊三賜璽書
銀幣以乞休降俸二級秋寇三萬騎抵綏德遊擊張鵬却
之總兵官吳英追出塞東路叅將周尚立兵亦至夾擊敗
之而巡按御史殷學請治罪部議延緩兵俱調宣大寇
方避實擊虛而我能以寡勝衆宜錄其功乃加守禮太子
少保謫學於外守禮尋以憂去二十九年秋舉邊才自被
薦詔趣上道寇退止不行久之卒

景濤字濟之蒲州人正德癸酉舉人庚辰進士授南京陝西道監察御史留都倉場中官久依爲市濤搜詭冒愼出納革樣米禁公私科擾儲政一清遷北臺尋按畿內首罷貴臣赴陵供需繼疏止薊山開礦免刑典利辨冤救荒悉稱旨詔築沙河宮城濤條上四事工遂停尋按江右嚴科條數十欵北還衣敝不充原筭人以趙清獻比之擢順天府丞疏陳徵畿民牛車乞運京粟出關不便以疾作乞歸年六十二卒

奴昂蒲州人正德己卯舉人醇篤馴雅三任知縣兩遷府判賢聲丕著有古循良風陝西通志云奴昂字伯謙嘉靖間韓城知縣時吏胥多不檢昂至約束如濕薪兩造聽訊隸人不敢索一錢廊吏終歲食數斗粟抱文案趨承而已里

甲飼馬外無別供上官遣隸人至韓日給三飯飯之外不得竊逞隸人轉相告後遂絕跡於韓韓人以青天呼之

楊瞻字叔俊蒲州人正德己卯舉人知扶風縣秩滿擢監察御史疏請薛文清瑄從祀孔廟出按江北激揚清濁貪墨斂迹相水勢築石堤居民利之遷四川川北道尋謝政歸著祀先睦族錄行於世後以子博貴贈兵部尚書

黃連字續之萬泉人正德中官湖州府檢校陞大興縣主簿流寇犯境率民兵及家衆禦之弩殪數人賊攻益急死於陣事聞贈大興知縣遣官諭祭祀忠義祠

李軌萬泉人有孝行親歿廬墓三年正德中官江西南康照磨流寇陷城守臣皆遁獨與妻暢子某死之

劉漆蒲州人正德中以貢授平涼知縣愷悌作士惠和撫民

居官居鄉清白一致子成德進士爲風力御史歷叅議富著作成德從子一正中俱進士一正歷官陝西叅議剛果不阿一中授澄縣知縣學識精邃所著有大易圖

張嘉賓號兩山猗氏人少雋穎習舉子業累科不第入上舍爲福山丞雅不樂敲扑棄官歸以絃歌自娛徧歷境內名勝有馬生者官罷不能歸嘉賓養之數年卒資給而遣之薛侃榮河人性貞介幼聰敏從事刀筆公辯勤勵法律精明以例應銓正德中除河內縣尉清苦絕倫一塵不染上下咸服其才守列薦剡陞知曹縣恩不病威慈不礙法滕糧移曹曹苦累力請開豁曹民懽呼稱慶擢保定通判憂歸復除平涼通判尋陞隴州知州卒於官歷宦途二十餘年蔬食布衣無異寒素而實心經畫持法嚴毅唯乎不少寬

假士君子雅敬之

任彬蒲州人嘉靖壬午舉人授武強教諭陞平谷知縣守城禦寇有功陞知州轉兵脩副使致仕平谷有生祠子諫辰萬歷辛卯舉人東昌府同知能紹父業

何尚德字汝修猗氏人天姿穎異於墳典多所授閱德器純粹望之如卿雲和璧中嘉靖壬午經元授興安州知州洎任四載省刑薄斂以清廉著行之日庫有餘贖七百金毫不爲染尤人所難陞開封同知子弟甲科一時稱盛

杜漸字于達猗氏人嘗從學於宋震博通經書子史嘉靖壬午舉人任齊東知縣調掖縣艱歸補商城肅宗南巡中貴索供億不遂中傷落職商民扶老携幼犯蹕請留不許立祠祀焉卒後十餘年汝南喻按鹽河東下車首謂鄉士大

夫曰吾素不識杜君每見商民談及未嘗不流涕因監循
良坊於門

荀汝安蒲州人嘉靖乙酉舉人歷官四川按察司僉事呂涇
野贊曰在中州爲良有司在南臺爲真御史在西蜀爲名
僉憲此可以知其人矣

楊博字惟約蒲州人父瞻御史終四川僉事博舉嘉靖八年
進士除盤屋知縣調長安徵爲兵部武庫主事歷職方郎
中大學士翟鑾巡九邊以博自隨所過山川形勢士卒多
寡强弱皆疏記之至肅州屬番數百遮道要賞鑾慮來者
益衆不能給博請鑾盛儀衛集諸番轅門外數以天子宰
相至不悉衆遠迎將縛以屬吏諸番羅拜請罪乃稍賚其
先至者餘皆懼不復來鑾大喜還薦博可屬大事尚書張

瓚一切倚辦博上或中夜降手詔隨事條答悉稱旨毛伯
溫代瓚博當遷特奏留之已遷山東提學副使轉督糧參
政二十五年超拜右僉都御史巡撫甘肅大興屯利請募
民墾田永免科修築肅州榆樹泉甘州平川境外大蘆泉
諸地墩臺鑿龍首諸渠初罕東屬番遷肅州博爲築金塢
白城七堡召其長令率屬徙居之凡七百餘帳總兵官王
繼祖却寇永昌鎮羌參將蔡勲等戰鎮番山丹三告捷斬
首百四十餘級進博右副都御史母憂歸先是仇鸞鎮甘
肅博常發其貪罔三十事及鸞拜大將軍數毀之不聽服
闋召拜兵部右侍郎轉左經畧薊州保定潮河川水湍悍
不可城博緣水勢建石墩置戍守還督九門尋遷總督薊
遼保定軍務三十三年秋把鄰兒及打來孫十餘萬騎入

薊鎮攻牆上數遣騎偵博博環甲宿古北口城上督總兵官周益昌等力禦上大喜馳賜緋矛衣犒軍萬金寇攻四晝夜不得入乃并攻孤山口登牆官軍斷一人腕乃退屯虎頭山博募死士夜以火驚其營寇擾亂比明悉去進右都御史蔭子錦衣千戶明年復入擊却之擢兵部尚書加太子少保嚴嵩父子招權利一切格不行會父憂去俄起兵部尚書代許論博疏辭而大同右衛圍急改總督宣大山西軍務博墨纓馳出關寇引去右衛圍六月守將王德戰亡芻粟且盡死守無二心博厚加褒卹奏行善後十事給事中張學顏請留博鎮撫奏蠲被寇租因僉其丁壯爲義勇造偏箱車百輛有驚則右衛車東左衛車西使相聲援又以大同牆圯急繕治塞銀釵驛馬諸嶺以絕窺紫荊